


T 2511

8243

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
SEP 1 1938

三二五



國歸化并州虜犯塞監并州諸軍事胡奮擊破之
煌太守尹瓌卒州以燉煌令梁澄領太守事議郎
豐廢澄自領郡事豐死弟宏代之至是涼州刺史楊欣
斬宏傳首洛陽先是帝不豫及瘳群臣上壽詔曰每念
頃遇疫氣死亡爲之愴然豈以一身之休息忘百姓之
艱邪諸上禮者皆絕之夏五月鎮西大將軍汝陰王駿
討北胡斬其渠帥吐敦立國子學庚午大雪六月癸丑
薦荔支于太廟甲戌有星孛于氏自春旱至于是月始
雨吳京下督孫楷帥衆來降以爲車騎將軍封丹揚侯



白龍二見于新興井中秋七月有星孛于大角吳臨平湖自漢末壅塞至是自開父老相傳云此湖塞天下亂此湖開天下平癸丑安平王隆薨東夷十七國內附河南魏郡暴水殺百餘人詔給棺鮮卑阿羅多等寇邊西域戊巳校尉馬循討之斬首四千餘級獲生九千餘人於是來降八月庚辰河東平陽地震己亥以太保何曾為太傅太尉陳騫為大司馬司空賈充為太尉鎮軍大將軍齊王攸為司空有星孛于太微九月又孛于翼丁未起太倉於城東常平倉於東西市閏月荊州五郡水

流四千餘家冬十月以汝陰王駿為征西大將軍平南將軍羊祜為征南大將軍丁卯立皇后楊氏大赦賜王公以下及于鰥寡各有差十一月白龍二見于梁國十二月徵虜士安定皇甫謐為太子中庶子封后父鎮軍將軍楊駿為臨晉侯是月以平州刺史傅詢前廣平太守孟桓清白有聞詢賜帛二百匹桓百匹

三年春正月丙子朔日有蝕之立皇子裕為始平王安平穆王隆弟敦為安平王詔以衛將軍扶風王亮為宗師凡宗室戚屬所當施行皆諮之庚寅始平王裕薨有

星孛于西方使征北大將軍衛瓘討鮮卑力微三月平虜護軍文淑討叛虜樹機能等並破之有星孛于胃乙未帝將射雉慮損麥苗而止夏五月戊子吳將邵凱夏祥帥衆七千餘人來降六月益梁八郡水殺三百餘人沒邱閣別倉秋七月以都督豫州諸軍事王渾爲都督揚州諸軍事中山王睦以罪廢爲丹水侯八月癸亥徙扶風王亮爲汝南王東莞王佑爲琅邪王汝陰王駿爲扶風王琅邪王倫爲趙王渤海王輔爲太原王太原王顥爲河間王北海王陵爲任城王陳王斌爲西河王汝

南王東爲南陽王濟南王耽爲中山王河間王威爲章武王立皇子瑋爲始平王允爲濮陽王該爲新都王遐爲清河王鉅平侯羊祜爲南城侯以汝南王亮爲鎮南大將軍大風拔樹暴寒且冰郡國五隕霜傷穀九月戊子以左將軍胡奮爲都督江北諸軍事充豫徐青荆益梁七州大水傷秋稼詔振給之立齊王子璉爲遼東王贊爲廣漢王冬十一月丙戌帝臨宣武觀大閱至于壬辰十二月吳將孫慎入江夏汝南略千餘家而去是歲西北雜虜及鮮卑匈奴五溪蠻夷東夷三國前後十餘

輩各帥種人部落內附

四年春正月庚午朔日有蝕之三月甲申尚書左僕射
盧欽卒辛酉以尚書右僕射山濤爲尚書右僕射東夷
六國來獻夏四月山虫尤旗見於東井六月丁未陰平廣
武地震甲子又震涼州刺史楊欣與虜若羅拔能等戰
于武威敗績死之弘訓皇后羊氏崩秋七月己丑祔葬
景獻皇后羊氏于峻平陵庚寅高陽王緝薨癸巳范陽
王綏薨荆揚郡國二十皆大水九月以太傅何曾爲太
宰辛巳以尚書令李胤爲司徒冬十月以征北大將軍

衛瓘爲尚書令揚州刺史應綽伐吳皖城斬首五千級
焚穀米百八十萬斛十一月辛巳太醫司馬程據獻雉
頭裘帝以奇技異服典禮所禁焚之于殿前甲申勅內
外敢有犯者罪之吳昭武將軍劉翻厲武將軍祖始來
降辛卯以尚書杜預都督荊州諸軍事征南大將軍羊
祐卒十二月乙未西河王斌薨丁未太宰朗陵公何曾
薨是歲東夷九國內附

五年春正月虜帥樹機能攻陷涼州乙丑使討虜護軍
武威太守馬隆擊之二月甲午白麟見于平原三月匈

奴都督拔弈虛帥部落歸化乙亥以百姓饑饉減御膳
之半有星孛于柳夏四月又孛于女御大赦降除部曲
督以下質任丁亥郡國八兩雹傷秋稼壞百姓廬舍秋
七月有星孛于紫宮九月甲午麟見于河南冬十月戊
寅匈奴餘渠都督獨雍等帥部落歸化汲郡人不準掘
魏襄玉冢得竹簡小篆古書十餘萬言藏于祕府十一
月大舉伐吳遣鎮軍將軍琅邪王佃出涂中安東將軍
王渾出江西建威將軍王戎出武昌平西將軍胡奮出
夏口鎮南大將軍杜預出江陵龍驤將軍王濬廣武將

軍唐彬率巴蜀之卒浮江而下東西凡二十餘萬以太
尉賈充為大都督行冠軍將軍楊濟為副總統衆軍十
二月馬隆擊叛虜樹機能大破斬之涼州平肅慎來獻
搭矢石罍

太康元年春正月己丑朔五色氣冠日癸丑王渾尅吳
尋陽賴鄉諸城獲吳武威將軍周興二月戊午王濬唐
彬等尅丹陽城庚申又尅西陵殺西陵都督鎮軍將軍
留憲征南將軍成瑒西陵監鄭廣壬戌濬又尅夷道樂
鄉城殺夷道監陸晏水軍都督陸景甲戌杜預尅江陵

通志卷之十一
斬吳江陵督五延平南將軍胡奮尅江安於是諸軍並
進樂鄉荆門諸戍相次來降乙亥以濬爲都督益梁二
州諸軍事復下詔曰濬彬東下掃除巴丘與胡奮王戎
共平夏口武昌順流東騫直造秣陵與奮戎審量其宜
杜預當鎮靜零桂懷輯衡陽大兵旣過荊州南境固當傳檄
而定預當分萬人給濬七千給彬夏口旣平奮宜以七
千人給濬武昌旣了戎當以六千人增彬太尉充移屯
項總督諸方濬進破夏口武昌遂泛舟東下所至皆平
王渾周浚與吳丞相張悌戰于版橋大敗之斬悌及其

將孫震沈瑩傳首洛陽孫皓窮蹙是請降送璽綬於琅邪
王佑三月壬申王濬以舟師至于建鄴之石頭孫皓大
懼面縛輿櫬降于軍門濬杖節解縛焚櫬送于京都中
其圖籍尅州四郡四十三縣三百一十三戶五十二萬
三千吏三萬二千兵二十三萬男女口二百三十萬其
牧守以下皆因吳所置除其苛政示之簡易吳人大悅
乙酉大赦改元大酺五日恤孤老困窮夏四月河東高
平兩雹傷秋稼遣兼侍中張側黃門侍郎朱震分使揚
越慰其初附白麟見于頓丘三河魏郡弘農兩雹傷宿

麥五月辛亥封孫皓為歸命侯拜其太子為中郎諸子
為郎中吳之舊望隨才擢叙孫氏大將戰亡之家徙於
壽陽將吏渡江復十年百姓百工復二十年丙寅帝臨
軒大會引皓升殿群臣咸稱萬歲丁卯薦鄴涿酒于太
廟郡國六電傷秋稼庚午詔諸士卒年六十以上罷歸
于家庚辰以王濬為輔國大將軍襄陽侯杜預當陽侯
王戎安豐侯唐彬上庸侯賈充琅邪王佃以下增封於
是論功行封賜公卿以下帛各有差六月丁丑初置
車校尉官封丹水侯睦為高陽王甲申東夷十國歸

秋七月虜軻成泥寇西平浩豐殺督將以下三百餘人
東夷二十國朝獻庚寅以尚書魏舒為尚書右僕射八
月車師前部遣子入侍己未封皇弟延祚為樂平王白
龍三見于永昌九月群臣以天下一統屢請封禪帝謙
讓弗許冬十月丁巳除五女復十一月戊辰廣漢王贊
薨

二年春二月淮南丹楊地震三月丙申安平王敦薨賜
王公以下吳生口各有差詔選孫皓妓妾五千人入宮
東夷五國朝獻夏六月東夷五國內附郡國十六雨雹

大風拔樹壞百姓廬舍江夏泰山水流居人三百餘家
秋七月上黨又暴風雨雹傷秋稼八月有星孛于張冬
十月鮮卑慕容廆寇昌黎十一月壬寅大司馬陳騫薨
有星孛于軒轅鮮卑寇遼西平州刺史鮮于嬰討破之
三年春正月丁丑罷秦州并雍州甲午以尚書張華都
督幽州諸軍事三月安北將軍嚴詢敗鮮卑慕容廆於
昌黎殺傷數萬人夏四月庚午太尉曹公賈充薨閏月
丙子司徒廣睦侯李胤薨癸丑白龍二見于濟南秋

平州

入奏事九月東夷二十九

化獻其方物吳故將笮恭帛奉舉兵反攻害建鄴令遂
圍揚州徐州刺史嵇喜討平之冬十二月甲申以司空
齊王攸為大司馬督青州諸軍事鎮東大將軍琅邪王
伷為撫軍大將軍汝南王亮為太尉光祿大夫山濤為
司徒尚書令衛瓘為司空丙申詔四方水旱甚者無出
田租

四年春正月甲申以尚書右僕射魏舒為尚書左僕射
下邳王晃為尚書右僕射戊午司徒山濤薨二月己丑
立長樂亭侯寔為北海王三月辛丑朔日有蝕之癸丑

大司馬齊王攸薨夏四月任城王陵薨五月己亥大將軍琅邪王佃薨徙遼東王蕤為東萊王六月增九卿禮秩牂柯獠二千餘落內屬秋七月壬子以尚書右僕射下邳王晃為都督青州諸軍事丙寅兗州大水復其田租八月鄆善國遣子入侍假其歸義侯以隴西王泰為尚書右僕射冬十一月戊午新都王該薨以尚書左僕射魏舒為司徒十二月庚午大闕于宣武觀是歲河南及荊州揚州大水

五年春正月己亥青龍二見于武庫井中二月丙寅立南宮王子玷為長樂王壬辰地震夏四月任城魯國池水赤如血五月丙午宣帝廟梁折六月初置黃沙獄秋七月戊申皇子恢薨任城梁國中山雨雹傷秋稼減天下戶課三分之一九月南安大風折木郡國五大水隕霜傷秋稼冬十一月甲辰太原王輔薨十二月庚午大赦林邑大秦國各遣使來獻閏月鎮南大將軍當陽侯杜預卒

六年春正月庚申朔以比歲不登免租貸宿負戊辰以征南大將軍王渾為尚書左僕射尚書褚碧都督揚州

諸軍事揚濟都督荊州諸軍事三月郡國六隕霜傷桑
麥夏四月扶南等十國來獻參離四千餘落內附郡國
四旱十大水壞百姓廬舍秋七月巴西地震八月丙戌
朔日有蝕之減百姓綿綃三分之一白龍見于京兆以
鎮東大將軍王濬為撫軍大將軍九月丙子山陽公劉
康薨冬十月南安山崩水出南陽郡獲兩足獸龜茲焉
耆國遣子入侍十二月甲申大閱于宣武觀旬日而罷
庚子撫軍大將軍襄陽侯王濬卒

七年春正月甲寅朔日有蝕之乙卯詔以災異屢發令

公卿大臣各上封事極言其故多有所諱夏五月郡國
十三旱鮮卑慕容廆寇遼東秋七月朱提山崩捷為地
震八月東夷十一國內附京兆地震九月戊寅驃騎將
軍扶風王駿薨郡國八大水冬十一月壬子以隴西王
泰都督關中諸軍事十二月遣侍御史巡遭水諸郡出
後宮才人妓女以下二百七十人歸于家始制大臣聽
終喪三年己亥河陰雨赤雪二頃是歲扶南等二十一
國馬韓等十一國遣使來獻

八年春正月戊申朔日有蝕之太廟殿陷三月乙丑臨

商觀震夏四月齊國大水隕霜傷麥六月魯國大風拔
樹木壞百姓廬舍郡國八大水秋七月前殿地陷深數
丈中有破船八月東夷二國內附九月改營太廟冬十
月南康平固縣吏李蚩豆反聚衆攻郡縣自號將軍十一
月海安令蕭輔聚衆反十二月吳興人蔣迪聚黨反圍
陽羨縣州郡捕討皆伏誅南夷扶南西域康居各遣使
來獻是歲郡國五地震

九年春正月壬申朔日有食之詔刺史二千石糾濁揚
清又令內外群官舉清能拔寒素江東四郡地震二月

尚書右僕射陽夏侯

胡奮卒以尚書朱整為尚書右僕

射三月丁丑皇后親桑于西郊賜帛各有差壬辰初并
二社為一夏四月江上郡國八地震隴西隕霜傷宿麥
五月義陽王竒有罪黜為三縱亭侯詔內外群官舉守
令之才六月庚子朔日有食之徙章武王威為義陽王
郡國三十二大旱傷麥秋八月壬子星隕如雨詔郡國
五歲刑以下決遣無田庶獄九月東夷七國詣校尉內
附郡國二十四螟冬十一月癸卯立河間平王洪子英
為章武王戊申青龍黃龍各一見于魯國

十年夏四月以京兆太守劉霄陽平太守梁柳有政績
各賜穀千斛郡國八隕霜太廟成乙巳遷神主于新廟
帝迎于道左遂祫祭大赦文武增位一等作廟者二等
丁未尚書右僕射廣興侯朱整卒癸丑崇賢殿災五月
鮮卑慕容廆來降東夷十一國內附六月庚子山陽公
劉瑾薨復置二社冬十月壬子徙南宮王承爲武邑王
十一月丙辰守尚書令之光祿大夫荀勗卒帝疾瘳賜
王公以下帛有差含章殿鞠室火甲申以汝南王亮爲
大司馬大都督假黃鉞以封南陽王柬爲秦王始平王

瑋爲楚王濮陽王允爲淮南王並假節之國各統方州
軍事立皇子乂爲長沙王穎爲成都王晏爲吳王熾爲
豫章王演爲代王皇孫適爲廣陵王立濮陽王子迪爲
漢王始平王子儀爲毗陵王汝南王次子羨爲西陽公
徙扶風王暢爲順陽王暢弟歆爲新野公琅邪王覲弟
澹爲東武公繇爲東安公湛爲廣陵公卷爲東莞公改
諸王國相爲內史十二月庚寅太廟梁折是歲東夷絕
遠三十餘國西南夷二十餘國來獻虜壬戌奚軻男女
十萬口來降

太熙元年春正月辛酉朔改元己巳以尚書左僕射王
渾爲司徒司空衛瓘爲太保二月辛丑東夷七國朝貢
琅邪王覲薨三月甲子以右光祿大夫石鑿爲司空夏
四月辛丑以侍中車騎將軍楊駿爲太尉都督中外諸
軍事錄尚書事己酉帝崩于含章殿時年五十五葬峻
陽陵廟號世祖帝字暈弘厚造次必於仁恕容納讜正
未曾失色於人明達善謀能斷大事故得撫寧萬國綏
靜四方承魏氏奢侈刻弊之後百姓思古之遺風乃厲
以恭儉敦以寡欲有司嘗奏御牛青絲鞞斷詔以青

麻代之臨朝寬裕法度有恒高陽許允旣爲文帝所殺
允子竒爲太常丞帝將有事於太廟朝議以竒受害之
門不欲接近左右請出爲長史帝乃追述允夙望稱竒
之才擢爲祠部郎時論稱其夷曠平吳之後天下乂安
遂怠於政術耽於游宴寵愛后黨親貴當權舊臣不
得專任彛章紊廢請謁行矣爰至末年知惠帝弗克負
荷然恃皇孫聰睿故無廢立之心復慮非賈后所生終
致危敗遂與腹心共圖後事說者紛然乂而不定竟用
王佑之謀遣太子母弟秦王東都督關中楚王瑋淮南

王允並鎮守要害以彊帝室又恐楊氏之逼復以佑爲北軍中候以典禁兵旣而寢疾彌留至于大漸佐命元勳皆已先歿群臣惶惑計無所從會帝小差有詔以汝南王亮輔政又欲令朝士之有名望年少者數人佐之楊駿祕而不宣帝復尋至迷亂楊后輒爲詔以駿輔政促亮進發帝尋小聞問汝南王來未意欲見之有所付託左右荅言未至帝遂困篤中朝之亂實始乎斯矣

武帝泰始十年咸寧五年太康十年太熙元年即位二十六年

孝惠皇帝諱衷字正度武帝第二子也泰始三年立爲皇太子時年九歲太熙元年四月己酉武帝崩是日皇太子即皇帝位大赦改元爲永熙尊皇后楊氏曰皇太后立妃賈氏爲皇后夏五月辛未葬武皇帝於峻陽陵丙子增天下位一等預喪事者二等復租調一年二千石已上皆封關中侯以太尉楊駿爲太傅輔政秋八月壬午立廣陵王適爲皇太子以中書監何劭爲太子太師吏部尚書王戎爲太子太傅衛將軍楊濟爲太子太保遣南中郎將石崇射聲校尉胡奕長水校尉趙俊揚烈

將軍趙歡將屯兵四出冬十月辛酉以司空石鑿爲太尉前鎮西將軍隴西王泰爲司空

永平元年春正月乙酉朔臨朝不設樂詔改永熙二年爲永平元年又詔子弟及群官並不得謁陵丙午皇太子冠丁未見于太廟二月甲寅賜王公已下帛各有差癸酉鎮南將軍楚王瑋鎮東將軍淮南王允來朝戊寅復置祕書監官三月辛卯誅太傅揚駿駿弟衛將軍瑤太子太保濟中護軍張劭散騎常侍段廣揚邈左將軍劉預河南尹李斌中書令蔣俊東夷校尉文淑尚書武

茂皆夷三族壬辰大赦改元賈后矯詔廢皇太后爲庶人徙于金墉城告于天地宗廟誅太后母龐氏壬寅徵大司馬汝南王亮爲太宰與太保衛瓘輔政以秦王東爲大將軍東平王楙爲撫軍大將軍鎮東將軍楚王瑋爲衛將軍領北軍中候下邳王晃爲尚書令東安公繇爲尚書左僕射進封東安王督將侯者千八十一人庚戌免東安王繇及東平王楙繇徙帶方夏四月癸亥以征東將軍梁王彤爲征西大將軍都督關西諸軍事太少傅阮坦爲平東將軍監青徐二州諸軍事己巳以

太子太傅王戎爲尚書右僕射五月甲戌毗陵王軌薨
壬午除天下戶調綿絹賜孝悌高年鰥寡力田者帛八
三匹六月賈后矯詔使楚王瑋殺太宰汝南王亮太保
菑陽公衛瓘乙丑以瑋擅害亮瓘殺之曲赦洛陽以廣
陵王師劉寔爲太子太保司空隴西王泰錄尚書事秋
七月分揚州荊州十郡爲江州八月庚申以趙王倫爲
征東將軍都督徐兗二州諸軍事河間王顥爲北中郎
將鎮鄴太子太師何劭爲都督豫州諸軍事鎮許昌徙
長沙王乂爲常山王己巳進西陽公羨爵爲王辛未立

隴西世子越爲東海王九月甲午大將軍秦王東薨辛
丑徵征西大將軍梁王彤爲衛將軍錄尚書事以趙王
倫爲征西大將軍都督雍梁二州諸軍事冬十二月辛
酉京師地震是歲東夷十七國南夷二十四部並詣校
尉內附

二年春二月己酉賈后弒皇太后于金墉城秋八月壬
子夫赦九月乙酉中山王耽薨冬十一月大疫是歲沛
國雨雹傷麥

三年夏四月滎陽雨雹六月弘農郡雨雹深三尺冬十

月太原王泓薨

四年春正月丁酉朔侍中太尉安昌公石鑿薨夏五月蜀郡山移淮南壽春洪水出山崩地陷壞城府及百姓廬舍匈奴郝散反攻上黨殺長吏六月壽春地大震死者二十餘家上庸郡山崩殺二十餘人秋八月郝散帥衆降馮翊都尉殺之上谷居庸上庸並地陷裂水泉涌出人有死者大饑九月丙辰赦諸州之遭地災者甲午枉矢東北竟天是歲京師及郡國八地震

五年夏四月彗星見于西方李元孫至軒轅六月金城

地震東海雨雹深五寸秋七月下邳暴風壞廬舍九月鴈門新興太原上黨大風傷禾稼冬十月武庫火焚累代之寶十二月丙戌新作武庫大調兵器丹楊兩雹有石生于京師宜年里是歲荆揚兗豫青徐等六州大水詔遣御史巡行振貸

六年春正月大赦司空下邳王晃薨以中書監張華爲司空太尉隴西王泰爲尚書令衛將軍梁王彤爲太子太保丁丑地震三月東海隕霜傷桑麥彭城呂縣有流血東西百餘步夏四月大風五月荆揚二州大水匈奴

郝散弟度元帥馮翊北地馬蘭羌盧水胡反攻北地太守張損死之馮翊太守歐陽建與度元戰敗績徵征西大將軍趙王倫為車騎將軍以太子太保梁王彤為征西大將軍都督雍梁二州諸軍事鎮關中秋八月雍州刺史解系又為度元所破秦雍氏羌悉叛推氏帥齊萬年僭號稱帝圍涇陽冬十月乙未曲赦雍涼二州十一月丙子遣安西將軍夏侯俊建威將軍周處等討萬年梁王彤屯好時關中饑大疫

七年春正月癸丑周處及齊萬年戰於六陌王師敗績

處死之夏五月魯國兩雹秋七月雍梁州疫大旱隕霜殺秋稼關中饑米斛萬錢詔骨肉相賣者不禁丁丑司徒京陵公王渾薨九月以尚書右僕射王戎為司徒太子太師何劭為尚書左僕射

八年春正月丙辰地震詔發倉廩振雍州饑人三月壬戌大赦夏五月郊禱石破為二秋九月荆豫揚徐冀等五州大水雍州有年

九年春正月左積弩將軍孟觀伐氐戰于中亭大破之獲齊萬年徵征西大將軍梁王彤錄尚書事以北中郎

將河間王顥為鎮西將軍鎮關中成都王穎為鎮北大將軍鎮鄴夏四月鄴人張承基等妖言署置聚黨數千郡縣逮捕皆伏誅六月戊戌太尉隴西王泰薨秋八月以尚書裴頠為尚書僕射冬十一月甲子朔日有蝕之京師大風發屋折木十二月壬戌廢皇太子適為庶人及其三子幽于金墉城殺太子母謝氏

永康元年春正月癸亥朔大赦改元己卯日有蝕之丙子皇孫霖卒二月丁酉大風飛沙拔木三月尉氏兩血妖星見于南方癸未賈后矯詔害庶人適于許昌夏四

月辛卯日有食之癸巳梁王彤趙王倫矯詔廢賈后為庶人司空張華尚書僕射裴頠皆遇害侍中賈謐及黨與數十人皆伏誅甲午倫矯詔大赦自為相國都督中外諸軍事如宣文輔魏故事追復故皇太子位丁酉以梁王彤為太宰左光祿大夫何劭為司徒右光祿大夫劉寔為司空淮南王允為驃騎將軍己亥趙王倫矯詔害賈庶人于金墉城五月己巳立皇孫臧為皇太孫尚為襄陽王六月壬寅葬愍懷太子于顯平陵撫軍將軍清河王遐薨癸卯震崇陽陵標秋八月淮南王允舉兵

通志卷之二十一
六十一
討趙王倫不克允及其二子秦王郁漢王迪皆遇害曲
赦洛陽平東將軍彭城王植薨改封吳王晏為賓徒縣
王以齊王囧為平東將軍鎮許昌光祿大夫陳準為太
尉錄尚書事九月改司徒為丞相以梁王彤為之冬十
月黃霧四塞十一月戊午大風飛砂石六日乃止甲子
立皇后羊氏大赦大酺三日十二月彗星見于東方益
州刺史趙廞與略陽流人李庠害成都內史耿勝犍為
太守李密汶山太守霍固西夷校尉陳總據成都反
永寧元年春正月乙丑趙王倫篡帝位丙寅遷帝于金

甬城號曰太上皇改金墉曰永昌宮廢皇太孫臧為濮
陽王五緯經天縱橫無常癸酉倫害濮陽王臧略陽流
人李特殺趙廞傳首京師三月平東將軍齊王囧起兵
以討倫傳檄州郡屯于陽翟征北大將軍成都王穎征
西大將軍河間王顥常山王乂豫州刺史李毅兖州刺
史王彥南中郎將新野公歆皆舉兵應之衆數十萬倫
遣其將閻和出伊闕張泓孫輔出瑯坂以距囧孫會士
猗許超出黃橋以距穎及穎將趙驤石超戰於渙水會
等大敗棄軍走閏月丙戌朔日有食之夏四月歲星晝

見固將何勗盧播擊泓於陽翟大破之斬孫輔等辛酉
左衛將軍王輿與尚書淮陵王漼勒兵入宮禽倫黨孫
秀孫會許超士猗駱休等皆斬之遂倫歸第即日乘輿
反正群臣頓首謝罪帝曰非諸卿之過也癸亥詔大赦
改元孤寡賜穀五斛大酺五日誅趙王倫義陽王威九
門侯質等及倫之黨與五月立襄陽王尚為皇太孫六
月戊辰大赦增吏位二等復封賓徒王晏為吳王庚午
東萊王蕤左衛將軍王輿謀廢齊王固事泄蕤廢為
庶人輿伏誅夷三族甲戌以齊王固為大司馬都督

外諸軍事成都王頴為大將軍錄尚書事河間王顥為
太尉罷丞相復置司徒官己卯以梁王彤為太宰領司
徒封齊王固功臣葛禰牟平公路季小黃公衛毅平陰
公劉真安鄉公韓泰封丘公秋七月甲午立吳王晏子
國為漢王復封常山王乂為長沙王八月大赦戊辰原
徙邊者益州刺史羅尚討羌破之己巳徙南平王祥為
宜都王下邳王韓薨以東平王楙為平東將軍都督徐
州諸軍事九月追東安王繇復其爵丁丑封楚王瑋子
範為襄陽王冬十月流人李特反於蜀十二月司空何

劭薨封齊王囧子冰為樂安王英為濟陽王超為淮南王是歲郡國十二旱六蝗

太安元年春正月庚子安東將軍譙王隨薨三月癸卯赦司冀亮豫四州皇太孫尚薨夏四月彗星晝見五月乙酉侍中太宰領司徒梁王彤薨以右光祿大夫劉寔為太傅太尉河間王顥遣將衙博擊李特於蜀為特所敗特遂陷梓潼巴西害廣漢太守張微自號大將軍癸卯以清河王遐子暉為皇太子賜孤寡帛大酺五日以齊王囧為太師東海王越為司空秋七月亮豫徐冀等

四州大水冬十月地震十二月丁卯河間王顥表齊王囧窺伺神器有無君之心與成都王穎新野王歆范陽王虓同會洛陽請廢囧還第長沙王乂奉乘輿屯南止車門攻囧殺之幽其諸子于金墉城廢囧弟北海王寔大赦改元以長沙王乂為太尉都督中外諸軍事封東萊王蕤子炤為齊王

二年春正月甲子朔赦五歲刑三月李特攻陷益州荊州刺史宋岱擊特斬之傳首京師夏四月特子雄復據益州五月義陽蠻張昌舉兵反以山都人丘沉為主

改姓劉氏偽號漢建元神鳳攻破郡縣南陽太守劉彬
平南將軍羊伊鎮南大將軍新野王歆並遇害六月遣
荊州刺史劉弘等討張昌于方城王師敗績秋七月中
書令卜粹侍中馮蓀河南尹李含等貳於長沙王乂乂
疑而害之張昌陷江南諸郡武陵太守賈隆零陵太守
孔紘豫章太守閻濟武昌太守劉根皆遇害昌別帥石
冰寇揚州刺史陳徽與戰大敗諸郡盡沒臨淮人封雲
舉兵應之自阜陵寇徐州八月河間王顥成都王穎舉
兵討長沙王乂帝以乂爲大都督帥軍禦之庚申劉弘

及張昌戰於清水斬之顥遣其將張方穎遣其將陸機
牽秀石超等來逼京師乙丑帝幸十三里橋遣將軍皇
甫商距方於宜陽己巳帝旋軍于宣武場庚午舍于石
樓天中裂無雲而雷九月丁丑帝次于河橋壬午皇甫
商爲張方所破甲申帝軍于芒山丁亥幸偃師辛卯舍
于豆田癸巳尚書右僕射興晉侯羊玄之卒帝旋于城
東丙申進軍緱氏擊牽秀走之大赦張方入京城燒清
明開陽二門死者萬計石超逼乘輿于緱氏冬十月壬
寅帝旋于宮石超焚緱氏服御無遺丁未破牽秀范陽

王暕于東陽門外戊申破陸機于建春門石超走斬其
大將賈崇等十六人懸首銅駝街張方退屯十三里橋
十一月辛巳星晝隕聲如雷王師攻方壘不利方決于
金塢水碓皆涸乃發王公奴婢手舂給兵廩一品已下
不從征者男子十三以上皆從役又發奴助兵號為四
部司馬公私窮蹶米石萬錢詔命所至一城而已壬寅
夜赤氣竟天隱隱有聲丙辰地震癸亥東海王越執
長沙王乂幽於金墉城尋為張方所害甲子大赦丙
寅揚州秀才周玘前南平內史王矩前吳興內史顧

祕起義軍以討石冰冰退自臨淮趣壽陽征東將軍劉
準遣廣陵度支陳敏擊冰李雄自郫城攻益州刺史羅
尚尚委城而遁雄盡有成都之地封鮮卑段勿塵為遼
西公

永興元年春正月丙午尚書令樂廣卒成都王穎自鄴
諷于帝乃大赦改元為永安帝逼於河間王顥密詔雍
州刺史劉沉秦州刺史皇甫重以討之沉舉兵攻長安
為顥所敗張方大掠洛中還長安於是軍中大餒人相
食以成都王穎為丞相穎遣從事中郎成夔等以兵五

萬屯十二城門殿中宿所忌者穎皆殺之以三部兵代宿衛二月乙酉廢皇后羊氏幽于金墉城黜皇太子覃爲清河王三月陳敏攻石冰斬之揚徐二州平河間王顥表請立成都王穎爲太弟戊申詔曰朕以不德纂承鴻緒于茲十有五載禍亂滔天姦逆仍起至於幽廢重宮宗廟圯絕成都王穎溫仁惠和尅平暴亂其以穎爲皇太弟都督中外諸軍事丞相如故大赦賜鰥寡高年帛三匹大酺五日丙辰盜竊太廟服器以太尉顥爲太宰太傅劉寔爲太尉六月新作三城門秋七月丙申朔

右衛將軍陳昫以詔召百寮入殿中陳勒兵討成邵王穎戊戌大赦復皇后羊氏及皇太子覃己亥司徒王戎東海王越高密王簡平昌公模吳王晏豫章王熾襄陽王範右僕射荀藩等奉帝北征至安陽衆十餘萬穎遣其將石超距戰己未六軍敗績于蕩陰矢及乘輿百寮分散侍中嵇紹死之帝傷頰中三矢亡六璽帝遂幸超軍餒甚超進水左右奉秋桃超遣弟熙奉帝之鄴穎帥羣官迎謁道左帝下輿涕泣其夕幸于穎軍穎府有九錫之儀陳留王送貂蟬衣鷄尾明日乃備法駕幸于鄴

唯豫章王熾司徒王戎僕射荀藩從庚申大赦改元爲
建武八月戊辰潁殺東安王繇張方復入洛陽廢皇后
羊氏及太子單幼奴左賢王劉淵反畔於離石自號太
單于安北將軍王浚遣烏丸騎攻成都王潁于鄴大敗
之潁與帝單車走洛陽服御分散倉卒上下無齋侍中
黃門被囊中齋私錢三千詔貸用所在買飯以供宮人
止食於道中客舍宮人有持升餘杭米飯及燥蒜鹽豉
以進帝帝噉之御中黃門布被次獲嘉市麤米飯盛以
瓦盆帝噉兩盂有老父獻蒸雞帝受之至溫將謁陵

帝喪履納從者之履下拜流涕左右皆獻歎及濟河張
方帥騎三千以陽燧青蓋奉迎方拜謁帝躬止之辛巳
大赦賞從者各有差冬十一月乙未方請帝謁廟因劫
帝幸長安方以所乘車入殿中帝馳避後園竹中方逼
帝升車左右中黃門鼓吹十二人步從惟中書監盧志
侍側方以帝幸其壘帝令方具車載宮人寶物軍人因
妻略後宮分爭府藏魏晉以來之積埽地無遺矣行次
新安寒甚帝墮馬傷足尚書高光進面衣帝嘉之河間
王顥帥官屬步騎三萬迎于霸上顥前拜謁帝下車止

之以征西府爲宮惟僕射荀藩司隸劉暉太常鄭球河
南尹周馥與其遺官在洛陽爲留臺承制行事號爲東
西臺焉丙午留臺大赦改元復爲永安辛丑復皇后羊
氏李雄僭號成都王劉淵僭號漢王十二月丁亥詔曰
天禍晉邦冢嗣莫繼成都王穎自在儲貳政績虧損四
海失望不可承重其以王還第豫章王熾先帝愛子令
問日新四海注意今以爲皇太弟以隆我晉邦以司空
越爲太傅與太宰顓夾輔朕躬司徒王戎參錄朝政光
祿大夫王衍爲尚書左僕射安南將軍虓安北將軍濬

平北將軍騰各守本鎮高密王簡爲鎮南將軍領司隸
校尉權鎮洛陽東中郎將模爲寧北將軍都督冀州鎮
于鄴鎮南大將軍劉弘領荊州以鎮南土周馥繆胤各
還本部百官皆復職齊王囿前應還第長沙王乂輕陷
重刑封其子紹爲樂平縣王以奉其嗣自頃戎車屢征
勞費人力供御之物皆減三分之一戶調田租三分減一
蠲除苛政愛人務本清通之後當還東京大赦改元以
河間王顓都督中外諸軍事

二年春正月甲午朔帝在長安夏四月詔封樂平王紹

為齊王丙子張方廢皇后羊氏六月甲子侍中司徒安
豐侯王戎薨隴西太守韓稚攻秦州刺史張輔殺之李
雄僭即帝位國號蜀秋七月甲午尚書諸曹火燒崇禮
闈東海王越嚴兵徐方將西迎大駕成都王穎部將公
師藩等聚衆攻陷郡縣害陽平太守李志汲郡太守張
延等轉攻鄴平昌公模遣將軍趙驤擊破之八月辛丑
大赦驃騎將軍范陽王虓逐冀州刺史李義揚州刺史
曹武殺丹楊太守朱建李雄遣其將李驤寇漢安車騎
大將軍劉弘逐平南將軍彭城王釋于宛九月庚寅朔公

師藩又害平原太守王景清河太守馮熊庚子豫州刺
史劉喬攻范陽王虓於許昌敗之壬子以成都王穎為
鎮東大將軍都督河北諸軍事鎮鄴河間王顥遣將軍
呂朗屯洛陽冬十月丙子詔曰得豫州刺史劉喬檄稱
潁川太守劉輿迫脅驃騎將軍虓距逆詔令造構凶逆
擅劫郡縣合聚兵衆擅用荀晞為兗州斷截王命鎮南
大將軍荊州刺史劉弘平南將軍彭城王釋等其各勒
所統徑會許昌與喬并力今遣右將軍張方為大都督
統精卒十萬建武將軍呂朗廣武將軍蹇羆建威將軍

刁默等為軍前鋒共會許昌除輿兄弟丁丑使前車騎
將軍石超北中郎將王闡討輿等赤氣見于北方東西
竟天有星孛于北斗平昌公模遣將軍宋胄等屯河橋
十一月立節將軍周權詐被檄自稱平西將軍復皇后
羊氏洛陽令何喬攻權殺之復廢皇后十二月呂朗等
東屯滎陽成都王穎進據洛陽張方劉玄等並按兵不
能禦范陽王虓濟自官渡拔滎陽斬石超襲許昌破劉
喬於蕭喬奔南陽右將軍陳敏舉兵反自號楚公矯稱
被中詔從沔漢奉迎天子遂揚州刺史劉機丹楊太守
王曠遣弟恢南略江州刺史應邈奔弋陽

光熙元年春正月戊子朔日有食之帝在長安河間王
顥聞劉喬破大懼遂殺張方請和於東海王越越不聽
宋胄等破穎將樓哀進逼洛陽穎奔長安甲子越遣其
將祁弘宋胄司馬纂等迎帝二月東萊恠令劉柏根反
自稱恠公襲臨淄高密王簡奔聊城王浚遣將討柏根
斬之夏四月己巳東海王越屯于溫顥遣弘農太守彭
隨北地太守刁默距祁弘等於湖五月枉矢西南流范
陽國地燃可以爨壬辰祁弘等與刁默戰默大敗顥穎

走南山奔于宛弘等所部鮮卑大掠長安殺二萬餘人
是日日光四散赤如血甲午又如之己亥弘等奉帝還
洛陽帝乘牛車行宮籍草公卿跋涉戊申驃騎范陽王
虓殺司隸校尉邢喬己酉盜取太廟金匱及策文各四
六月丙辰朔至自長安升舊殿哀感流涕謁于太廟復
皇后羊氏辛未大赦改元秋七月乙酉朔日有食之太
廟吏賈苞盜太廟靈衣及劔伏誅八月以太傅東海王
越錄尚書驃騎將軍范陽王虓為司空九月頓丘太守
馮嵩執成都王穎送之于鄴進東嬴公騰為東燕王

平昌公模為南陽王冬十月司空范陽王虓薨虓長史
劉輿害成都王穎十一月庚午帝崩于顯陽殿時年四
十八葬太陽陵帝之為太子也朝廷咸知不堪政事武
帝亦疑焉嘗悉召東宮官屬使以尚書事令太子決之
帝不能對賈妃遣左右代對多引古義給使張泓曰太
子不學陛下所知今宜以事斷不可引書妃從之泓乃
具草令帝書之武帝覽而大悅太子遂安及居大位政
出群下綱紀大壞貨賂公行勢位之家以貴陵物忠賢
路絕讒邪得志更相薦舉天下謂之互市焉高平王沉

作釋時論南陽魯褒作錢神論廬江杜嵩作任子春秋
皆疾時之作也帝又常在華林園聞蝦蟆聲謂左右曰
此鳴者為官乎私乎或對曰在官地為官在私地為私
及天下荒亂百姓餓死帝曰何不食肉糜其蒙蔽皆此
類也後因食麪中毒而崩或曰司馬越之鳩云

惠帝永平九年元康元年太安二年永興二年光
熙元年即位十六年

孝懷皇帝諱熾字豐度武帝第二十五子也太熙元
年封豫章郡王屬惠帝之時宗室構禍帝冲素自守

門絕賓游不交世事專玩史籍有譽於時初拜散騎常
侍及趙王倫篡見收倫敗為射聲校尉累遷車騎大將
軍都督青州諸軍事未之鎮永興元年改授鎮北大將
軍都督鄴城守諸軍事十二月丁亥立為皇太子弟帝以清
河王暉本太子也懼不敢當典書令廬陵脩肅曰二相
經營王室志寧社稷儲貳之重宜歸時望親賢之舉非
大王而誰清河幼弱未允衆心是以既升東宮復贊藩
國今乘輿播越二宮又曠常恐氏羌飲馬於涇川螳衆
控弦於霸水宜及吉辰時登儲副上翼大駕早寧東宮

下允黔首顛顛之望帝曰卿吾之宋昌也乃從之
光熙元年十一月庚午孝惠帝崩羊皇后以於太弟爲
媿不得爲太后催清河王覃入已至尚書閤侍中華焜
等急召太弟癸酉即皇帝位大赦尊皇后羊氏爲惠皇
后居弘訓宮追尊所生太妃王氏爲皇太后立妃梁氏
爲皇后十二月壬午朔日有食之己亥封彭城王植子
融爲樂城縣王南陽王模殺河間王顥於雍谷辛丑以
中書監溫羨爲司徒尚書左僕射王衍爲司空己酉
葬孝惠皇帝于太陽陵李雄別帥李離寇涼州

永嘉元年春正月癸丑朔大赦改元除三族刑以太傅東
海王越輔政殺御史中丞諸葛玫二月辛巳東萊人王彌
起兵反寇青徐二州長廣太守宋巖東牟太守龐仇並
遇害三月己未朔平東將軍周馥斬送陳敏首丁卯改
葬武悼楊皇后庚午立豫章王詮爲皇太子辛未大赦
庚辰東海王越出鎮許昌以征東將軍高密王簡爲征
南大將軍都督荊州諸軍事鎮襄陽改封安北將軍東
燕王騰爲新蔡王都督司冀二州諸軍事鎮鄴以征南
將軍南陽王模爲征西大將軍都督秦雍梁益四州諸

軍事鎮長安并州諸郡為劉淵所陷刺史劉琨獨保晉陽夏五月馬牧帥汲桑聚眾反敗魏郡太守馮嵩遂陷鄴城害新蔡王騰燒鄴宮火旬日不滅又殺前幽州刺史石劼於樂陵入掠平原山陽公劉秋遇害洛陽步廣里地陷有二搗出蒼蒼者冲天白者不能飛建寧郡夷攻陷寧州死者三千餘人秋七月己酉朔東海王越進屯官度以討汲桑己未以平東將軍琅邪王睿為安東將軍都督揚州江南諸軍事假節鎮建鄴八月己卯朔撫軍將軍苟晞敗汲桑於鄴甲辰曲赦幽并司冀兗豫等

六州分荊州江州八郡為湘州九月戊申苟晞又破汲桑陷其九壘辛亥有大星如日小者如斗自西方流於東北天盡赤俄有聲如雷始修千金竭於許昌以通運冬十一月戊申朔日有食之甲寅以尚書右僕射和郁為征北將軍鎮鄴十二月戊寅并州人田蘭薄盛等斬汲桑于樂陵甲午以前太傅劉寔為太尉庚子以光祿大夫延陵公高光為尚書令東海王越矯詔囚清河王覃于金墉城癸卯越自為丞相以撫軍將軍苟晞為征東大將軍

二年春正月丙子朔日有食之丁未大赦二月辛卯清河王暉為東海王越所害庚子石勒寇常山安北將軍王浚討破之三月東海王越鎮鄆城劉淵侵汲郡略有頓丘河內之地王彌寇青徐兗豫四州夏四月丁亥入許昌諸郡守將皆奔走五月甲子彌遂寇洛陽司徒王衍帥衆禦之彌退走秋七月甲辰劉淵寇平陽太守宋抽奔京師河東太守路述力戰死之八月丁亥東海王越自鄆城遷屯于濮陽九月石勒寇趙郡征北將軍和郁自鄆奔于衛國冬十月甲戌劉淵僭帝號於平陽仍

稱漢十一月乙巳尚書令高光卒丁卯以太子少傅荀藩為尚書令己酉石勒寇鄴魏郡太守王粹戰敗死之十二月辛未朔大赦立長沙王乂子碩為長沙王甚為臨淮王

三年春正月甲午彭城王釋薨三月戊申征南大將軍高密王簡薨以尚書左僕射山簡為征南將軍都督荆湘交廣等四州諸軍事司隸校尉劉暉為尚書左僕射丁巳東海王越歸京師乙丑勒兵入宮於帝側收近臣中書令繆播帝舅王延等十餘人並害之丙寅曲赦河

南郡丁卯太尉劉寔請老以司徒王衍爲太尉東海王越領司徒劉淵寇黎陽遣車騎將軍王堪擊之王師敗績于延津死者三萬餘人大旱江漢河洛皆竭可涉夏四月左積弩將軍朱誕叛奔于劉淵石勒攻陷冀州郡縣百餘壁秋七月戊辰當陽地裂三所各廣三丈長三百餘步辛未平陽人劉芒蕩自稱漢後誑誘羌戎僭帝號於馬蘭山支胡五斗叟郝索聚衆數千爲亂屯新豐與芒蕩合黨劉淵遣子聰及王彌寇上黨圍壺關并州刺史劉琨使兵救之爲聰所敗淮南內史王曠將軍

施融曹超及聰戰又敗超融死之上黨太守龐淳以郡降賊九月丙寅劉聰圍浚儀遣平北將軍曹虎討之丁丑王師敗績東海王越入保京城聰至西明門越禦之戰於宣陽門外大破之石勒寇常山安北將軍王浚使鮮卑騎救之大破勒於飛龍山征西大將軍王模使其將淳于定破劉芒蕩五斗叟並斬之使車騎將軍王堪平北將軍曹虎討劉聰王師敗績堪奔還京師李雄別帥羅羨以梓潼歸順劉聰攻洛陽西明門不尅宜都夷道山崩荆湘二州地震冬十一月石勒陷長樂安北將

軍王斌遇害因屠黎陽乞活帥李暉薄盛等帥衆救京
師聰退走暉等又破王彌于新汲十二月乙亥夜有白
氣如帶自地升天南北各二丈

四年春正月乙丑朔大赦二月石勒襲鄆城兗州刺史
袁孚戰敗爲其部下所害勒又襲白馬車騎將軍王堪
死之李雄將文碩殺雄大將軍李國以巴西歸順戊午
吳興人錢璿反自稱平西將軍三月丞相倉曹屬周玘
帥鄉人討璿斬之夏四月大水將軍祁弘破劉淵將劉
靈曜于廣宗李雄陷梓潼兗州地震五月石勒寇汲郡

執太守胡寵遂南濟河滎陽太守裴純奔建鄴大風折
木地震幽并司冀秦雍等六州大蝗食草木牛馬毛皆
盡六月劉淵死其子和嗣僞位和弟聰弒和而自立秋
七月聰從弟曜及其將石勒圍懷詔征虜將軍宋抽救
之爲曜所敗抽死之九月河內人樂仰執太守裴整叛
降于石勒徐州監軍王隆自下邳棄軍奔于周馥雍州
人王如舉兵反於宛殺害令長自號大將軍司雍二州
牧大掠漢沔新平人龐寔馮翊人嚴疑京兆人侯脫等
各起兵應之征南將軍山簡荊州刺史王澄南中郎將

杜弼並遣兵援京師及如戰於宛諸軍皆大敗王澄獨以衆進至沔口衆潰而歸冬十月辛卯晝昏至于庚子大星西南墜有聲壬寅石勒圍倉垣陳留內史王讚擊敗之勤走河北士子以驃騎將軍王浚爲司空平北將軍劉琨爲平北大將軍京師饑東海王越羽檄徵天下兵帝謂使者曰爲我語諸征鎮若今日尚可救後則無逮矣時莫有至者石勒陷襄陽太守崔曠遇害遂至宛王浚遣鮮卑文鴛帥騎救之勒退浚又遣別將王申始討勒於汶石津大破之十一月甲戌東海王越帥衆出

許昌以行臺自隨宮省無復守衛荒饑日甚殿內死人交橫府寺營署並掘塹自守盜賊公行枹鼓之音不絕越軍次項自領豫州牧以太尉王衍爲軍司丁丑流氏隗伯符等襲宜都太宰嵇晞建鄴壬申申始攻劉曜王彌於瓶壘破之鎮東將軍周馥表迎大駕遷都壽陽越使裴頡討馥爲馥所敗走保東城請救於琅邪王睿襄陽大疫死者三千餘人加涼州刺史張軌安西將軍十二月征東大將軍苟晞攻王彌別帥曹嶷破之乙酉平陽人李洪帥流人入定陵作亂

五年春正月帝密詔荀晞討東海王越壬申晞為曹嶷所破乙未越遣從事中郎將楊瑁徐州刺史裴盾共擊晞癸酉勒入江夏太守楊珉奔于武昌乙亥李雄攻陷涪城梓潼太守譙登遇害湘州流人杜弢據長沙反戊寅安東將軍琅邪王睿使將軍甘卓攻鎮東將軍周馥於壽春馥衆潰庚辰太保平原王幹薨二月石勒寇汝南汝南王祐奔建鄴三月戊午詔下東海王越罪狀告方鎮討之以征東大將軍荀晞為大將軍丙子東海王越薨四月戊子石勒追東海王越喪及於東郡將軍錢

端戰死軍潰太尉王衍吏部尚書劉望廷尉諸葛銓尚書鄭豫武陵王澹等皆遇害王公已下死者十餘萬人東海世子毗及宗室四十八王尋又没于石勒賊王桑冷道陷徐州刺史裴盾遇害桑遂濟淮至于歷陽五月益州流人汝班梁州流人蹇撫作亂於湘州虜刺史苟眺南破零桂諸郡東掠武昌安城太守郭察邵陵太守鄭融衡陽內史滕育並遇害進司空王浚為大司馬征西大將軍南楊王模為太尉太子太傅傅祗為司徒尚書令荀藩為司空安東將軍琅邪王睿為鎮東大將軍

東海王越之出也使河南尹潘滔居守大將軍苟晞表
遷都倉垣帝將從之諸大臣畏滔不敢奉詔且宮中及
黃門戀資財不欲出至是饑甚人相食百官流亡者十
八九帝召群臣會議將行而警衛不備帝撫手歎曰如
何曾無車輿乃使司徒傳祗出詣河陰修理舟楫爲水
行之備朝士數十人導從帝步出西掖門至銅駝街爲
盜所掠不得進而還六月癸未劉曜王彌石勒同寇洛
川王師頻爲賊所敗死者甚衆庚寅司空苟藩光祿大
夫荀組奔轅轅太子左率溫畿夜開廣莫門奔小平津

丁酉劉曜王彌入京師帝開華林園門出河陰藕池欲
幸長安爲曜等所追及曜等遂焚燒宮廟逼辱妃后吳
王晏竟陵王楙尚書左僕射和郁右僕射曹馥尚書閭
丘冲袁粲王緄河南尹劉默等皆遇害百官士庶死者
三萬餘人帝蒙塵於平陽劉聰以帝爲會稽公苟藩移
檄州鎮以琅邪王爲盟主豫章王端東奔苟晞晞立爲
皇太子自領尚書令具置官屬保梁國之蒙縣百姓饑
儉米斛萬餘價秋七月大司馬王浚承制假立太子置
百官署征鎮石勒寇穀陽沛王滋戰敗遇害八月劉聰

使子粲攻陷長安太尉征西將軍南陽王模遇害長安
遺人四千餘家奔漢中九月癸亥石勒襲陽夏至于蒙
縣大將軍苟晞豫章王端並沒于賊冬十月勒寇豫州
諸郡至江而還十一月猗盧寇太原平北將軍劉琨不
能制徙五縣百姓於新興以其地居之

六年春正月帝在平陽劉聰寇太原故鎮南府牙門將
胡亢聚衆寇荆土自號楚公二月壬子日有蝕之癸丑
鎮東大將軍琅邪王睿上尚書檄四方以討石勒大司
馬王浚移檄天下稱被中詔承制以苟藩爲太尉汝陰

王熙爲石勒所害夏四月丙寅征南將軍山簡卒秋七
月歲星熒惑太白聚于斗牛石勒寇冀州劉粲寇晉陽
平北將軍劉琨遣部將郝詵討衆禦粲詵敗績死之太
原太守高喬以晉陽降粲八月庚戌劉琨奔于常山己
亥陰平都尉董冲逐太守王鑿以郡叛降于李雄辛亥劉
琨乞師于猗盧表盧爲代公九月己卯猗盧使子利孫
赴琨不得進辛巳前雍州刺史賈疋討劉粲於三輔走之
關中小定乃與衛將軍梁芬吉兆太守梁綜共奉秦王
鄴爲皇太子於長安冬十月猗盧自將六萬騎次于盩

城十一月甲午劉粲遁走劉琨收其遺衆保于陽曲是
歲大疫

七年春正月劉聰大會使帝著青衣行酒侍中庾珉號
哭聰惡之丁未帝遇弒崩于平陽時年三十帝初誕有
嘉禾生於豫章之南昌先是望氣者云豫章有天子氣
其後竟以豫章王爲皇太弟在東宮恂恂謙損接引朝
士講論書籍及即位始遵舊制臨太極殿使尚書郎讀
時令又於東堂聽政至於宴會輒與群官論衆務考經
籍黃門侍郎傅奕歎曰今日以見武帝之世矣秘書監

荀崧又常謂人曰懷帝天姿清少著英猷若遭承平
足爲守文佳主而繼惠帝擾亂之後東海專政無幽厲
之釁而有流亡之禍

懷帝永嘉七年

孝愍皇帝諱鄴字彥旗武帝孫吳孝王晏之子也出
繼後伯父秦獻王東襲封秦土永嘉二年拜散騎常
侍撫軍將軍及洛陽傾覆避難於滎陽密縣與舅荀
藩荀組相遇自密南趨許潁豫州刺史閻鼎與前撫
軍長史王毗司徒長史劉疇中書郎李昕及藩組等

同謀奉帝歸于長安而疇等山中塗復叛鼎追殺之藩
組僅而獲免鼎遂挾帝乘牛車自宛趣武關頻過山
賊士卒亡散次于藍田鼎告雍州刺史賈疋疋遽遣
州兵迎衛達于長安又使輔軍將軍梁綜助守之時
有玉龜出霸水神馬鳴城南焉六年九月辛巳奉秦
王爲皇太子登壇告類建宗廟社稷大赦加疋征西
大將軍以秦州刺史南陽王保爲大司馬賈疋討賊
張連遇害衆推始平太守麴允領雍州刺史爲盟主承
制損置

建興元年夏四月丙午奉懷帝崩閏舉哀成禮壬申即
皇帝位大赦改元以衛將軍梁芬爲司徒雍州刺史麴
允爲使持節領軍將軍錄尚書事京兆太守索綝爲尚
書右僕射石勒攻龍驤將軍李暉於上白暉敗死之五
月壬辰以鎮東大將軍琅邪王睿爲侍中左丞相大都
督陝東諸軍事大司馬南陽王保爲右丞相大都督陝
西諸軍事詔二王尅期大舉六月石勒害兖州刺史田
徽是時山東郡國相繼陷于勒秋八月癸亥詔命始達
于揚州改建鄴爲建康改鄴爲臨漳杜弼寇武昌燒焚

城邑破別將王真襲沔揚荊州刺史周顛奔于建康九月司空荀藩薨于滎陽劉聰寇河南河南尹張髦死之冬十月荊州刺史陶侃討杜弢黨杜曾於石城爲曾所敗己巳大雨雹庚子大雪十一月流人楊武攻陷梁州十二月河東地震兩肉

二年春正月己巳朔黑霧著人如墨連夜五日乃止辛未庚時日墮于地又有二月相承出於西方而東行丁丑大赦楊武大略漢中遂奔李雄二月壬寅以司空王浚爲大司馬衛將軍荀組爲司空涼州刺史張軌爲太

尉封西平郡公并州刺史劉

大將軍三月癸酉石

勒陷幽州殺侍中大司馬幽州

收博陵公王浚焚燒城

邑害萬餘人杜弢別帥王真襲荊州刺史陶侃於林鄣

侃奔灑中夏四月甲辰地震五月壬辰太尉領護羌校

尉涼州刺史西平公張軌薨六月劉曜趙冉寇新豐諸

縣安東將軍索綝討破之也七月曜冉等又逼京師領

軍將軍麴允討破之冉中以矢而死九月北中郎將劉寅

尅頓丘斬石勒所署太守邵攀丙戌麟見襄平單于代

公猗盧遣使獻馬蒲子匡生人

三年春正月盜殺晉昌太守趙珮吳興人徐馥害太守
袁琇以侍中宋哲為平東將軍屯華陰二月丙子進左
丞相琅邪王睿為大都督督中外諸軍事右丞相南陽
王保為相國司空荀組為太尉大將軍劉琨為司空進
封代公猗盧為代王荊州刺史陶侃破王真於巴陵杜
弼別將杜弘張彥與臨川內史謝摛戰于海昏摛敗績
死之三月豫章內史周訪擊杜弘走之斬張彥於陳夏
四月大赦五月劉聰寇并州六月盜發漢霸杜二陵及
薄太后陵太后面如生得金玉練帛不可勝紀時以朝

廷草創服章多闕勅收其餘以實內府丁卯地震辛巳
大赦勅雍州掩骼埋胔脩復陵墓有犯者誅及二族秋
七月石勒陷濮陽害太守韓弘劉聰寇上黨劉琨遣將
救之八月癸亥戰于襄垣王師敗績荊州刺史陶侃攻
杜弼弼敗走道死湘州平九月劉曜寇北地命領軍將
軍麴允討之冬十月允進攻青白城以豫州牧征東將
軍索綝為尚書僕射都督宮城諸軍事劉聰陷馮翊太
守梁肅奔萬年十二月涼州刺史張寔送皇帝行璽一
紐盜殺安定太守趙班

四年春二月代王猗盧薨其衆歸于劉琨夏四月丁丑
劉曜寇上郡太守籍韋率其屬奔于南鄭涼州刺史張
寔遣步騎五千來赴京都石勒陷廩丘北中郎將劉寅
出奔五月平夷太守雷炤害南廣太守孟桓帥二郡三
千餘家叛降于李雄六月丁巳朔日有食之大蝗秋七
月劉曜攻北地麴允帥步騎三萬救之王師不戰而潰
北地太守麴昌奔于京師曜進至涇陽渭北諸城悉潰
建威將軍魯充散騎常侍梁緯少府皇甫陽等皆死之
八月劉曜偏京師內外斷絕鎮西將軍焦嵩平東將軍

宋哲始平太平竺恢等同赴國難麴允與公卿守長安
小城以自固散騎常侍華輯監京兆馮翊弘農上洛四
郡兵東屯霸上鎮軍將軍胡崧帥城西諸郡兵屯遮馬
橋並不敢進冬十月京師饑甚米斗金二兩人相食死
者大半太倉有麴數十麴麴允屑為粥以供帝至是復
盡帝泣謂允曰今窘厄如此此外無救援死於社稷是朕
事也然念將士暴離斯酷今欲聞城未陷為羞死之事
庶令黎元免屠爛之苦行矣遣書朕意決矣十一月乙
未使侍中宋敞送棧於曜帝乘羊車肉袒銜璧輿襯出

降群臣號泣攀車執帝之手帝亦悲不自勝御史中丞
吉朗自殺曜焚櫬受壁使宋敞奉帝還宮初有童謠曰
天子何在豆田中時王浚在幽州以豆有藿殺隱士霍
原以應之及帝如曜營營實在城東豆田壁辛丑帝蒙
塵於平陽麴允及群官並從劉聰假帝光祿大夫懷安
侯壬寅聰臨殿帝稽首于前麴允伏地慟哭因自殺尚
書辛賓梁允侍中梁濬散騎常侍嚴敦左丞相臧振黃
門侍郎任播張偉杜曼及諸郡守並爲曜所害華輯奔
南山石勒圍樂平司空劉琨遣兵援之爲勒所敗樂平

太守韓據出奔司空長史李弘以并州叛降于勒十二
月甲申朔日有食之己未劉琨奔薊依段匹磾

五年春正月帝在平陽庚子虹霓彌天三日並照平東
將軍宋哲奔江左李雄使其將李恭羅寅寇巴東二月
劉聰又使其將劉暢攻滎陽太守李距擊破之三月琅
邪王春承制改元稱晉王於建康夏五月丙子日有食
之秋七月大旱司冀青雍等四州蝻蝗石勒亦競取百
姓禾時人謂之胡蝗八月劉聰使趙固襲衛將軍華蒼
於定潁遂害之冬十一月丙子日有食之劉聰出獵令

帝行車騎將軍戎服執戟為導百姓聚而觀之故老或
歔歔流涕聰聞而惡之聰後因大會使帝行酒洗爵反
而更衣又使帝執蓋晉臣在坐多失聲而泣尚書郎辛
賓抱帝慟哭為聰所害十二月戊戌帝遇弒崩于平陽
時年十八帝之繼皇統也屬永嘉之亂天下崩離長安
城中戶不盈百牆宇頽毀蒿棘成林朝廷無車馬章服
惟桑版署號而已衆惟一旅公私有車四乘器械多闕
運饋不繼巨猾滔天帝京危急諸侯無釋位之志征鎮
關勤王之舉故君臣窘迫以至殺辱云

愍帝建興五年

右自武帝受禪至愍帝合五十二年是為西晉
元帝興江東為東晉

晉紀第十上

通志十上

